

Buna sira, buna sira, me cari siuri! E ben, c'me c'la va?
 Ist salut al ripetuma da chi an s'ist palc da 66 ani e a speruma ad ripetli ancora per tonc ani: us pö nent cambiè, perchè a l'è la dimustrasion 'd'l'interess, a direiva quasi d'l'amur ca j'uma per voi chi veni a vighi sta Divota Cumedia, per sta sità c'l'è grisa ma l'è la nostra e l'è tranquila, per tucc i lisandren e per tut la gent c'l'è amnija chi e pö a s'è fermaja perchè ansema ai mandrogn a s'è trovaja ben! E se voi i sei chi, semper acsi tonc el vo di che an po' ad ben i mal vori anche voi!!

Sa, sta sità andonda c'us pudreisa vivi ancora pü ben s'la fijsa aministraja an po' pü ben!
 Se, perchè se t'ai stai a senti lur, i candidati, quondi ca suma suta a j'esion, c'mè cu j'è capità sta pruma, it prumètu qualunque roba e te t'ai credi o, almenu, at speri chi fasu cuc cosa; ma nenta tont: noi as cuntentuma ad poc; ma ch'il fejsu dabon! Per esempi chi rangieisu el Casté ad Mareng, ch'el casca a toc anche se tücc i na parlu e i na scrivu, chi bütejsu an urdin el Palazzetto dello Sport, chi fejsu funsiunè la piscina, che anveci a l'è peina ad babi!

Quondi chi favu i cumisi. no. nent an piasa perchè an tont u j'andava pü ansèn, ma an t'el television perchè, vist che la gent l'andava pü da lur, lur i s'anfilavu an ca' toua, e t'avi in bel gnachè i buton e girè i canal: ta t'na trovavi semper cuc d'èn c'ut parlava an t'el mur! Cert voti ut smiava ad senti la radiocronaca c'mè quondi cu j'era Coppi e Bartali au Gir d'Italia: "Un uomo solo a.... Palazzo Rosso!"

Ui l'ha facia, l'è andacc, l'è semper lü, a l'è russ, tut circundà dai russ!! Chi sà se cuce vota el ven russ anche da la vergogna, lü e tucc i so amis d'l'aministrasion del Cumèn. Chi sà si venu russ quondi chi pensu a Sonta Maria ad Casté: j'on bütà trei cavalèt e doi cartel e la quistion a l'è bele che risolta! Chisà si venu russ quondi che i genitur is lamentu per el mensi d'la scola, cula che na vota ai ciamavu refesion. Anveci d'aurei fè tont i mudern col diti specialisai chi giru el scoli coi camion, u sarejva stacc mej ch'jeisu dicc: "Uardè gent, a suma nent bon, purtev turna adrera el cavagnen c'mè ca favu na vota!", almenu el mamì i savu se ch'ij davu da mangè al so masnà!

Anveci lur no! I voru fè i grandius e anlura cui pochi sold ch'jon ij drobu magari per fè l'illuminasion ad Via Cavour! E dato che el marciapé a l'è stricc, ad lampion ij n'on bütà toncc e sciasi che me, sa j'eisa da pasè con la me cavagna bele pejna ai stareiva nenta. Figürumsi na

carusëta, in passeggiu o an machi j'en col paracqua quondi ch'el piöv!! E an tont du stra pü an là a l'è tut scur perchè el lampadeini vegi i son tüti brüsaji.

O se no i fon el "Mese dell'Architettura"! Ma se ca l'è? I sonju cui chi fon i palasi, chi rongiu el strà? Anlura a l'è la vota bouna! E pö t'at uardi an gir e at vighi anmach di marciapé sciapà e suta tucc i porti d'la sità di trabicul con di cartlon cus capis nient du tut. E antont uj casca i toc ad curnison del Municipio e lur i fon niente!

A sö nent si j'ei facc cas che, da quondi ch'jon spustà el mercà d'an Piasa Ratass an Piasa Savouna, i cumerciont an ver sira i son tucc pü nervus. No, l'è nent per la frigg o perchè che magari j'on vendì poc, no. L'è che dato che ad "Vespasiani" lé anturn uj n'a j'è pü meja, quondi ch'jon dambsojn um bsogna chi vagu an t'el bar pü dausen. Pruvè an po' a fè el cont ad quoncc caffè ch'jon duvì piè au long a la giornà!!!

Aurijsa nent che i noster aministratur j'eisu baratà j'ogg con la coua, ch'jaughijsu e chi fejsu tut au l'incuntrari!! In pruverbi di noster vegg, anveci, i l'on sübit amparà e butà an pratica. Se, a l'è cul là cu dis che "masè la gent, bati el nus e spalè la fioca i son tucc travaj inutil". Difatti la gent la mor da sula, el nus cascu su da la pionta e la fioca la slengua quondi che el fa coud. As na suma antajà quondi c'l'è fiucà l'8 e u 9 ad December e a scumët ch'iv na sei antaja anche voi, quondi chi pruvavi a traversè el strà peini ad fioca.

Certo ch'l'è semper pü difìcil capì sti pulitic. Me anche sa ven da la campagna, a fas fadeja a capì se chi voru d'ì sti fiù e ist pionti ch'jon bütà an si stemma di parti: i republicon j'on semper avì l'edera, e va ben; i radical j'on tirà fora la rosa: sa na j'à del speini sa rosa lè!! I sicialista in bel mument jon tirà fora el garofu.... russ, us capis! Mah, us vigh che "il sole dell'avvenire" a l'è tramuntà! I comunista a dess j'on anventà la quercia...verda!?! L'è bela grosa neh! Speruma chi riesu a nascondsi tucc, adrerà a sa quercia!!

Anveci pö u j'è cui che at riesi nenta a spustei d'an s'el cadrighen gnonc per quond!

Altissimo... a l'è semper grond acsè!. Andreotti pö a l'è pes che in gat ad marmu: l'è semper an mes, i cuntinuu a anterughel tucc ans qualunque roba cu j'è capità an tucc ist'iani che lu l'è stacc al Guvern - e i son tonc, neh! - e lu u sa mai niente, l'a vist mai gnente e l'è semper lè! Tant l'è veira che na vota Craxi, che c'mè tut la povra gent l'era andacc an vaconsa le d'adrera, a Aimemè an Tunisia, l'ava ancuntrà jën con in camel cui fà: "Tu Bettino? Me beduino. Vu cumprà cammello?" "No! -

u j'a rispundì - lasa perdi cu na j'è sa jën a Ruma con na goba pes che cula du to camel e pü testard ancura!"

Ui sarejva da di ancura tont robi ad cul cui capita an t'el mond ma... u sarà per in atra vota. Speruma anmach c'l'abia nent da scupiè na guera là an t'el Golfo e che tucc isti povri fiò chi son là an tu desert i posu andè a cà el pü prestu pusibil. Ringrasiuma u Signur che almenu la nostra gent c'l'era là l'à pudì amnì a cà per Nadal! Na vota a jo senti jën cu diva: a di che u Signur u j'è el po esi na buseja, ma di che u Signur u j'è nenta a l'è na buseja ancur pü grosa!

U Signur u j'è, l'è nasì quondi ca j'eru noi pastur là, per andel a adurè. L'è per sulè che ist'Asuciasion di Frà, c'l'è stacia fundaja setont'ani fà - e a l'uma festegià ist'ani, ist'aniversari chi ant'ist salon e ant'la curt - ist'Asuciasion da 66 ani suta el festi ad Nadal la vo ricordè, an po' al bouni ma con tont sentiment ist gron mument c'la cambià dabon el mond!! L'è c'a pos nent fela da sul sta Divota Cumedia e anlura av present la me famija....

